

তারিখ: ২২/০৪/২০২১ (পৃ: ০৫)

বোরোর ভালো ফলনে খুশি কৃষক লকডাউনে শ্রমিক সংকটের আশঙ্কা

জেলা বার্তা পরিবেশক, নওগাঁ

উদ্বৃত্ত ধান উৎপাদনের জেলা নওগাঁয় চলতি ইরি-বোরো মৌসুমের ধান কাটা শুরু করেছেন কৃষকরা। ভাল ফলন পাওয়ায় অনেকটাই খুশি জেলার কৃষকরা। কৃষি বিভাগের তথ্যমতেও এ বছর জেলায় বোরো ধানের বাম্পার ফলন হয়েছে। তবে লকডাউনের কারণে শ্রমিক সংকটের আশঙ্কায় রয়েছে জেলার কৃষকরা। কৃষি সম্প্রসারণ অধিদফতর নওগাঁর উপ-পরিচালক কৃষিবিদ মো. শামসুল ওয়াদুদ জানিয়েছেন, বর্তমানে জেলার আত্রাই, রানীনগর উপজেলায় এবং সদর উপজেলার দক্ষিণে বিলাঞ্চলে ধান কাটা শুরু হয়েছে। এসব এলাকার কাটা ধানের হিসেবে প্রতি হেক্টরে চালের আকারে ৪ দশমিক ২০ মেট্রিক টন ফলনের প্রত্যাশা করছে কৃষি বিভাগ। আর আগামী ১০ দিনের মধ্যে জেলায় পুরোদমে ধান কাটা শুরু হবে বলে জানিয়েছে কৃষি বিভাগ।

কৃষি বিভাগের সূত্র অনুযায়ী এ বছর জেলায় মোট ১ লাখ ৮৭ হাজার ৭শ' ৬০ হেক্টর জমিতে বোরো ধানের উৎপাদন হয়েছে। এরমধ্যে সদর উপজেলায় ১৭ হাজার ৯শ' ৯০ হেক্টর, রানীনগরে ১৮ হাজার ৮শ' হেক্টর, আত্রাইয়ে ১৮ হাজার ৪শ' হেক্টর, বদলগাছিতে ১১ হাজার ৭শ' ৫০ হেক্টর, মহাদেবপুরে ২৮ হাজার ৩শ' ৭০ হেক্টর, পল্লীতলায় ১৯ হাজার ৬শ' ৫০ মেট্রিক টন, ধামইরহাটে ১৮ হাজার ৬শ' ৫ হেক্টর, সাপাহারে ৫ হাজার ২শ' ৩০ হেক্টর, পোরশায় ৮ হাজার ৫০ হেক্টর, মান্দায় ১৯ হাজার ৯শ' ৩০ হেক্টর এবং নিয়ামতপুর উপজেলায় ২০ হাজার ৯শ' ৮৫ হেক্টর। জেলায় চলতি বছর উন্নত ফলনশীল জাতের মধ্যে উল্লেখযোগ্য হিসেবে জিরাশাইল, ত্রিধান-২৮, ত্রিধান-২৯, ত্রিধান-৮১, ত্রিধান-৫৮, কাটারীভোগসহ প্রায় ২৬ জাতের ধান চাষ করেছেন। অপরদিকে হাইব্রিড জাতের মধ্যে তেজ, এস এল-৮ এইচ, হিরনা-২, হিরা-৬ ও ঝলকসহ প্রায় ২৮ জাতের ধান চাষ করেছেন।

কৃষি বিভাগের তথ্য মতে হেক্টর প্রতি ৪ দশমিক ২০ মেট্রিক টন হিসেবে এ বছর জেলায় মোট ৭ লাখ ৮৮ হাজার ৫শ' ৯২ মেট্রিক টন চাল উৎপাদিত হবে বলে প্রত্যাশা করা যাচ্ছে। বেশকিছু কৃষকের সঙ্গে কথা বলে জানা গেছে, এবার বোরো ধানের তারা ভাল ফলন বেশি পাচ্ছেন। এই মৌসুমে ধানে পোকা ও রোগের আক্রমণ কম হওয়ায় তেমন কীটনাশক ব্যবহার করতে হয়নি তাদের। এছাড়াও আবহাওয়া ধানের অনুকূলে থাকায় বাম্পার ফলন হয়েছে।